

## *EBÈLÙ, NSHAPÌTÀ MWIBÌDÌ 2*



...kwanji kulwa, ne kulonga Mifundu, bwa kumònayè mwa kucipàlakaja ne kumòna ní cívwa Bulelèlà anyì to. Kucyàngacilayè, Bulelèlà abu, ku Dipungila Dikùlukulu. Mpindyewu, Pòlò ùvwa mumanyi wa dibàla wa Dipungila Dikùlukulu. Mbanganyì bàdì bamanyè nàнку awu? Ùvwa mulongeshila ku makàsà a umwe wa ku bamanyi bàà mabàla bàà batàmbe bwìmpè bàà ditùkù dyèndè, Gàmalìèlè, mumanyi wa dibàla mutàmbe kumanyika. Ne Pòlò ùvwa mumanyè Dipungila Dikùlukulu. Nenku ndi ngeela meeji ne dinyùkushiibwa dyèndè dya kumpàla, mûngãmbì mu dinda emu, mpààkajaadikàye bwa lufù lwà Stèfanò. Cintu kampàndà cívwa ne cya kwikala cipyè Pòlò, bwalu mu mifundù yèndè yònsò ùvwa anu wènza kuleedilakù ne: “Ncyèna mukùmbànyìne to, bwalu ntu mukèngèshe Ekeleeziya too ne ku lufù. Mémè ndi mutàmbe bukese wa munkaci mwàbò.”

<sup>95</sup> Kaa, kàdi Nzambi ùvwa ne meeji mashìllàngàne pa bwalu abu. Yèyè ùvwa umwe wa ku bantu bàà batàmbe kwikala bàà bukòlè bàà ditùkù adi.

Kumòna Pòlò Munsantu, mupostolo munene  
Ne mùzàbì wèndè wùbàlakana bikòlè ne  
mulenga kumòna, (mùdì mwedi wa kasàla  
mwambè)  
Kaa, ncyà bushuwa ne kùdi ne cya kwikala  
mbilà  
Patwàsangilà bònsò Kuntwaku.

Ditùkù dinène adi pàngààmumònà ùpeta cifulu cya butùmbì cya mufwile diitabuuja, difutu dya mufwile diitabuuja!

<sup>96</sup> Ngàkiimanakù ku luseke lwà kaacibambalu kakese kàà kale aku, anu abidi àdì panshì aa, mwàkafùndilàye Mikàndà eyi amu. Ne pashìishe ki kumukòsabò mutù. Ne kumukùpabò mu mùkìdì wa mwinshì mwa buloba, bwa kumupwekeshila ku bùcyafù bwa mu mùkìdì awu. Nenku keena Yudà aku kuntwaku, wákamba ne: “Ndi ne bimanyinu bya Yesu Kilisto mu mubidi wànyì emu. Ndi mulwangàne ne nyama ku Efèsò, kàdi ndi mulwangàne mvità mìmpè. Ngààjikìjì lubilu. Ndi mulamè Diitabuuja. Nenku kubangila ku leelu, mbantèèkèlè cifulu cya butùmbì cya bwakàne, cyàmpèèshà Mukalenge, Mulumbulwishi mwakàne, mu Ditùkù adi. Ne kí ng’anu mémè nkààyaanyì to, kàdi ewu yònsò udi munangè dimwènèka Dyèndè.” Mushindu mwine wùndì munangèpu aci’s wè! Kaa, ndi muswè kubadiibwa pàmwè naabò! Kale wàwa tuvwa twimba musambu ewu ne:

Kaa, udikù muswè kubadiibwa bu umwe wa mu cisumbù Cyèndè cya mikooko anyi?  
 Udikù muswè kubadiibwa bu umwe wa mu cisumbù Cyèndè cya mikooko anyi?  
 Ikàlà kùyi katobà munda to, ikàlà mutàbàle ne mwindile dibandila dya bülwalwà ebu;  
 Yèyè ùlwalwa cyàkàbìdì.

97 Ndi muswè kwikala umwe wabò. Mpindyewu mufùndi ewu nyawù ùtùngunuka ne kwamba ne:

*Ki bwa cinyi bìwwa bikèngela twètù kufila . . . kutàmba kutèya ntèmà ku maalù atùdì bumvwè, bwa dībà kanà dyònsò katwìkadi twâlwa kuàlekela àfinuka àya.*

98 Mutwàlongèshì pa cyòcì aci, mu dinda emu, cyàmba mu mvensà mwi2 ne: “Pìikalàbi ne . . .”

*Bwalu pìikalàbi ne dīyì dyamba kùdì banjelo . . .*

99 Tudi tusangana ne *banjelo* mbanganyi? Bapròfeta. “Nzambi wàkaakwila mu bikondo bya kale . . .” Mpindyewu, bikèngela nwènù kwenza, kaciyi mmwènenu wetù twètù to, kàdì wa Bible. Mpindyewu nshapità wa kumpàla, wa . . . nshapità wa kumpàla, mvensà wa kumpàla.

*Nzambi, uvwa mu bikondo bya kale . . . mu mishindu mishùlèshùlàngàne mwakwìle . . . ne baataatu kùdì bapròfeta,*

100 Mpindyewu ùdì ùya apa, wàmba kabidi.

*Bwalu pìikalàbi ne dīyì dyamba kùdì banjelo dīwva dishimàte, . . .*

Nenku *mwanjelo* mbwena kwamba cinyi? “Mùsànjeelà.” Pìikalàbi ne Nzambi ùwva ùlaaba mùsànjeelà . . . Ne dībà adi pìikalàbi ne twètù tudi beedìbwe maanyi, tudi baamisànjeelà bàà Nzambi. Tudi baamisànjeelà kùdì bàà pa buloba, mùlòpò wà ku Dyulu, biikàle tujikula ne tudi beenyi ne beena lwendu. Katwèna bàà pa buloba ebu to. Kàdì tudi twenda tukèba Cimenga cicilwalwà, cidì Mwibaki ne Mwenji mwikàle Nzambi. Katwèna tutèekela mabanji pa buloba ebu to, pàdì bìyì bàpanda bàbwela, ne mbùmbà, ne dimòmà, bibìnyanga. Bwalu, ètù mabanji àdì àsanganyiibwa mu Dyulu, mùdì Yesu musòmbe ku dyàbalùmè dya Mutàmbe bunene. Kaa, cintu kaayi cya butùmbe ne cya cikèmesha’s wè, bwa kumanya ne:

Ditèkemena dyetu kī ndyashila pa cingà cintu to

Ànu pa Mashì ne bwakànè bwà Yesu;

Pìikalà byònsò bidì mu nyùngulukilu wa musùkà wànyì mwa kuupuka,

Dībà adi Yèyè kī ditèkemena dyànyì ne nshinga udi mukwàte bwàtù bwànyì.

Pa Kilisto, Lubwebwe lushindàme, mpàndì  
mwimàne;  
Myaba mikwabo yònsò nduntekà,  
Myaba mikwabo yònsò nduntekà.

101 Mushindu mwine wùdì Eddie Perronet mufùnde musambu awu, mu bikondo bya dikèngeshiibwa's wè!

Mpindyewu, *piikalàbi ne dîyi dyamba kùdì banjelo divwa dishimàte...* (Pàvwa mùsànjeelà wà Nzambi wàmba Dîyi, Dìvwa dishààla diimàne.)...ne difutu dyònsò *dyàkapeta difutu dyakànyine;*

*Mmunyi mutwàpàndukà* mpindyewu, *twètù* katùyi tutèeleja Kilisto, Ùdi wakwila mu Dyulu awu?

Mpindyewu tàngilàayi:

*Mmunyi mutwàpàndukà, twètù balèngùlùle lupàndu bunene nùнку, ...* (Anjì elàayi meeji ku bwalu abu.)...*lùdì* mu *dyàmbedi* lubangè *kwambiibwa kùdì Mukalenge, ...*

102 Kilisto ngwàkabanga mudimu Wèndè. CyàkenzàYe ncinyi? Tudi tuMutàngila, mùvwàYe...mudipwekèshe, wa mmwènekèlu mupwekèle, mùvwàYe kàyi mwena tèlòlòjì munene mumanya bimpè to. Kàdi Yèyè ùvwa mudipwekèshe, mupòle, wa kalolo. Kàvwa muyiishi wa bukolè to. Dyèndè Dîyi kadìvwa dyùmvwika mu mìsèsù to.

Kàdi Yone wàkapàtuka bu nyama wa ntambwe wa ùkungula. Ùvwa muyiishi.

103 Yesu wàkapàtuka, kàyi bu nyama wa ntambwe wa ùkungula to, kàdi Nzambi mwikàle ùkwàta Nèndè mudimu, ùshindika Dîyi. Nzambi ùvwa ne Kilisto. Peetèlò wàkamba, mu Ditùkù dya Mpenta ne: “Nwènù beena Izaleela, ne nwènù bàdì basòmbèle mu Yudaàya...Yesu wa mu Nazàlèetà, Muntu mwanyishiibwe kùdì Nzambi munkaci mwenu, ku bimanyinu ne maalu a kukèma ne bishimà, byàkenzelà Nzambi kùdìYe, munkaci mwenu bònsò, binùdì nwènù bònsò bantèmù bààbì.” Tàngilàayi mwàkabàcincimikàye naaci. “S’bivwa bikèngela bwa nwènù kwikala baMumanyè.”

104 Yesu wàkamba ne: “Nwènù beena lubombo.” Yèyè ne: “Nudi nupàtuka pambèlu nutàngila dîbà, ne nùdì...Kuulu nkukünze ne kubwitè, nwamba ne: ‘Kuulu nekùbwitè bikolè.’ Ne kwòkò kùbàlakana ne kwà muunyà mukolè, anyi ne bikwabo, nwamba ne: ‘Kuulu nekwikalè kwimpè.’” Yèyè ne: “Nudi mwa kujingulula mùdì dyulu, kàdi bimanyinu bya cikondo, kanùyi mwa kujingulula to. Bwalu bu nwènù baMmanyè Mèmè, nùнку nudi bamanyè ditùkù Dyànyì.”

105 Kaa, civwàYe mufwànyine kwikala mwelèle lubilà lukolè dilòò edi's. Mushindu mwine wùdì Nyuma Wèndè wèlela lubilà mu bayiishi Bèndè ne: “Dìbà dikaadi pabwipi!”

Twètù tudi tujungulula. Tudi tutàngila bômbè ya mushindà. Tudi tumanya ne nganyì wàngata kaaba kàà Clark Gable, ne nganyì wënza *cikampànda*, *cikansanga*, anyì *cikankènga*; anyì nganyì wíkala cindondà cya mfùmù wa ditùnga. Tudi tudìfila ku byôbì abi, kàdi katùyì mwa kujingulula bimanyinu bya cikondo. Tukàadi ku ndekeelu.

106 Ncinyì aci? Tudi tutàmba kudìfila ku ne: “Ndongamu wa télévison udi ulonda ngwa bishi? Cìikalà Susie mwa kwenza ncinyì?” anyì cìvwà dînà dya mukàjì awu. “Ne kwàya Arthur Godfrey mpenyì? Mbikàsà bya mushindu kaayi byènzàye musangu wàlondà ewu?” Twètù, bu beena Kilisto, tudi tusopakaja nyuma yetu mu nsebelà ya buindingingi bwa mushindu awu, pàvwàbi bìkèngela bwa twètù kwikala mu disambila mu mwaba kampànda, ne kulonga Bible, bwa kumanya bimanyinu bya cikondo citùdi ne mwoyi.

107 Cidì cyènza cyôci aci, misangu yàbùngì, mbantu bàà butekète bàdi mu byambilu, ncyà bushuwa, bàdi kabàyikù bàya ku binù bwa kutwàla Bulelèlè bwa Evanjeeliyo to. S’netwikalè ne cya kulumbulula bwa byôbì abi mu matùkù àcìlwalwà. Katwèna ne cya kulèngulula kantu nansha kàmwè to. Ne bantu, mutùdi ku Branham Tabernacle eku emu, bwa kumòna bimanyinu ne maalu a kukèma, ne bukolè bwa Kilisto mubiike ku lufù; ne pashiishe kumanya ne tudi bafwànyine kufila mèbà etu—etu pa bintu bya cyanàànà, ne kulèngulula kutèeleja Dìyì dya Mukalenge Yesu: “Mmunyì mutwàpàndukà, twètù tulèngulula lupàndù bunene nùnkù?”

108 Mvensà mwi3, anyì mvensà mwi4. Ki mwaba wutùvwà bajikijile, pa mvensà mwi4 apa, mu dinda emu.

*Nzambi mwikàle kabidi ùbàfidila bujaadiki, . . . (Kaa, ekèlekèle!)*

*Nzambi . . . ùbàfidila bujaadiki, . . .*

Tèelejàayi Dìyì.

*. . . ne ku bimanyinu . . . maalu a kukèma, ne ku bishimà bishùlèshùlàngàne, . . .*

Bishimà *bishùlèshùlàngàne* ncinyì? *Bishùlèshùlàngàne* ncinyì? *Bishùlèshùlàngàne* mbwena kwamba ne “byàbùngì.” “Ne bishimà *byàbùngì*, Nzambi mubàfidile bujaadiki.” Èyì Nzambi! Ndi ne dyeyemena ne neCìbwelè mu myoyi yenu. Tèelejàayaaku.

109 Mèmè ndi umwe wa ku bampaasàtà beenu, pàmwè ne Mwanèètù Neville kaaba aka. Ndi muswè bwa nùfundè nùCìlamè. Bible mmwambè ne: “Kwòkò kujuukè muntu munkaci mwenu, wàmba *cikampànda-cikansanga*, kàdi kaciyi cyènzeka to, kanùcitàeleji nansha, bwalu awu kî m’Mèmè udi mwakùle to. Kàdi yèyè mwakùle mu Dîna Dyànyì, ne cidiye wàmba aci cyènzeka, dîbà adi nùCitàèlèjaayi.” Amen. “Bwalu

Mémè ndi ne mupròfetà awu, anyi muyiishi awu, cyònsò cidici mwa kwikàle aci. Cìdiye wàmba aci cyòci cyenzèke, dîbà adi mutèèlèjaayi.”

110 Mpindewu, balundà bàanyi, tùMutèèlèjaayi Yèyè, Nyuma Mwimpè udi wakula munkaci mwetu awu, mwikàle ùleeja bishimà bishìlèshìlàngàne, ne bimanyinu, ne maalu a kukèma. KatùCyàngàci anu ne kabòko-tekètà byenzè mùdì maalu ètù àdì ènzekà pa ciibidilu aa to. Tùvulukàayi ne Cìdi n'Yesu Kilisto, umwèumwè awu makèlèlè, leelu, too ne kashidi; ùshìndika Dìyi Dyèndè. Tudi ne cya kucyènza. Kaa, swàyikù nùcyènzè. Tèyaayi ntèmà. Cintu cikhwabo cyònsò ciikalè cilondèle, nansha mene dîkù dyebe, bàyebe, mukàjèèbè, bàna beebe. Cyònsò cidici mwa kwikala aci, ùcìtèkèkè pa kaaba kiibìdì. Tèèka Nzambi kumpàla. Wèwè nyawù wamba ne: “Mwanèètù Branham, kumutù kwa bàna bàanyi anyi?” Kumutù kwà ní ncinyi cyònsò. Tèèka Nzambi kumpàla. Yèyè ikalè kumpàla.

111 Eliyà wàkatùuluka ku mukùnà, dîngà ditùkù. Yèyè's ùvwa mwanjelo, mùsànjeelà, mùsànjeelà wa Nzambi, mwela maanyi. Ki kusanganayè mukàji kampànda wa mu lufwilà wàngula tukùnyi tubidi. Kwambayè ne: “Ndà, ùkangooshilè kaakàtò kakese, ne ùkankèbèlèku ndambù wa màyi.”

112 Ki mukàji awu ne: “Anu mùdì musùukà wèbè ne mwoyi amu, ndi anu ne tûtò tukesèè, anyi musàbusabu mukesèè wà bukula bwa blé, bwa kwenza ka-crêpe kakese kàmwè. Ne ndi anu ne twanyi tukesè twà kwelamù, bwa kubisopakaja, bwa kusopa naatù bukula. Ne ndi ngangula tukùnyi tubidi.” Mushindu wa cyena-kale wùvwa ne, ki mushindu wa ba-Indiens, wa kucyàmakaja nkùnyi ne kuyìkwàcishila mudilu lwà pankaci apu, ne kutungunuka ne kuyìsonsola. Nkàadikù mwenzènze midilu mu cisuku mushindu awu. Yèyè ne: “Nenku nyààya koosha kaakàtò kakese aku bwànyi mémè ne mwanàanyi wa balùme, mwanàanyi wa pambidi. Nenku netùkàdyè ne netùfwe.” Kùvwa kwenzèke mushipu munda mwa bidimu bisatu ne ngondo yisambombo, kakùyikù màyi mwaba nansha wùmwè to.

113 Mupròfetà wa dísù dyumisha, mukùlumpè awu, kutàngilayè mukàji awu mumpàla. Kwambayè ne: “Anji ndà, ùngooshilè mémè kàtò aku dyàmbedi.” Dìyi ditùma kaayi's wè, bwa muntu mulùme wàmabila mukàji wa mu lufwilà, mwikàle ùfwa ne nzala, bwa àmudiishè yèyè kumpàla. Cyàkambàye ncinyi? “Bwalu EMU MMÜDÌ MUKALENGE WAMBÀ, cipànzà aci kacàyakushààla munda mutupù, anyi kàsù aku kakàakushààla munda mutupù to, too ne pàatùmà Nzambi mvùla pa buloba.”

Dyàmbedi, Nzambi. Mukàji awu kubwelayè e kwosha kaakàtò kakese aku, ne kulwayè kukàpèèsha mupròfetà awu. Kwalukilayè buludì ne kwoshayè kakwabo, ne kakwabo, ne kakwabo, ne kakwabo. Kàdi cipànzà aci kacàyakushààlakù munda mutupù, anyi kàsù aku kakàakushààlakù munda mutupù

to, too ne pàakatùmà Nzambi mvùla pa buloba. Mukàjì awu wàkatèèka Nzambi kumpàla kwa bânà bèndè. Wàkatèèka Nzambi kumpàla kwà nî ncinyi cyònsò. Wàkanji kwangata Bukalenge bwa Nzambi, dyàmbedi.

114 Nzambi ùdi ne cya kwikala ne kaaba kàà kumpàla mu mwoyi webè, kaaba kàà kumpàla mu nsòmbelu webè, kaaba kàà kumpàla mu byònsò byùdi wenza anyi byùdi. Nzambi ùdi ne cya kwikala kumpàla. Yèyè kàtu muswè kaaba kiibidi to. Yèyè kí mmukùmbànyine mwaba mwibidi to. Yèyè mmukùmbànyine cidi citàmbe bwimpè, ne cya kumpàla, ne byònsò bitùdi naabi. Yèyè ngudi mmubikùmbànyine. Dìnà Dyèndè dya cijila dibeneshiibwè!

*Bwalu Nzambi kabidi ùfila . . . bujaadiki, ùwva ùfila bujaadiki, ne ku bimanyinu ne ku maalu a kukèma, . . . bishimà bishùlèshùlàngàne, ne mapà a Nyuma Mwimpè, bilondèshile diswa dyèndè yèyè mwine dímpè?*

115 Kaciyi cìvwà bantu bamba to, kaciyi cìvwà ekeleeziya wamba to, kadi cìvwà diswa dya Nzambi aci. Kaa, bìdi bìkèngela bwa twètù kukèba diswa dya Nzambi, kí ndilengeleela dya mwena mutumba webè, kí ndilengeleela dya bânà bèèbe, kí ndilengeleela dya bàyeebè anyi dya mukàjèèbè to. Kadi, kèba diswa dya Nzambi, ne enza dyòdi adi dyàmbedi. Pashiishe bikwabo byònsò, diswa dya mukàjèèbè ne diswa dya bânà beebe, nedilwe pàmwè naadi. Kadi, tèka Nzambi kumpàla.

116 Mpindyewu, tàngilàayi.

*Bwalu kí nkùdi banjelo kwàkafilàye bukòòkeshi bwa buloba bùcìvwavwà, butùdi twamba ebu to.*

117 Mu ngaakwilù mukwabo, Banjelo banene bàdi bàkwàta mudimu mu Maulu abu, Ngabùdyèlè, Mikàèlà, Abisèntà, ne binunu makumi kuvudija ku binunu makumi bya Banjelo mu Dyulu; anyi binunu bya baprófetà bàvwàku pa buloba abu, yònsò wa kùdìbo; kacya Yèyè kàakatèèkakù nansha umwe wa kùdìbo bwa kukòntononayè buloba bùcìvwavwà, butùdi twamba ebu to. Nansha umwe! Kacya Yèyè kàakambakù ne: “Yeshàayi, wèwè neùkontononè buloba” to. Kacya Yèyè kàakatèèkakù buloba mu bukòòkeshi bwa Eliyà to. Anyi Yèyè kàakabutèèkakù mu bukòòkeshi bwa Ngabùdyèlè, anyi bwa mwanjelo, anyi nyuma mukwàcishi kanà yònsò ewu to.

118 Tàngilàayi cyàkambàye, Pólò awu, mucíkàle anu ùzànjika Kilisto, mwena bwalu butùdi twamba ebu.

*Kadi muntu kampànda mu mwaba kampànda wàkafila bujaadiki, wamba ne: Muntu nganyi, bwa wèwè kumwelela meeji, anyi mwànà wa muntu, bwa wèwè mufwànyine kumumwènekela?*

*Wèwè udi muMupwekèshe ndambù kwìnshì kwa banjelo; wèwè udi mumwasè cifulu cya butumbi ne cya*

*luumù, ne mumutèèke kumutù kwà midimu ya byanza byebe:*

<sup>119</sup> Mpindyewu, nwênù baswè kubala aci, m’Misambu 8.4-6, mùdì Davidì wàkula. Mpindyewu yèyè mmubiikile Davidì kaaba aka ne nganyi? Aci’s ncikòse bwalu, mwaba awu mene, bwa ne ní mvwa mubingè anyi ní mvwa mupìile mu dinda emu, pa bwalu bwa mupròfetà.

<sup>120</sup> Mmwambè ne: “Bwalu umwe wa ku banjelo mmwambè mu mwaba kampànda.” Davidì, mùsànjeelà wa Nzambi, ùvwa mwanjelo wa Nzambi, bwalu ùvwa mùsànjeelà wa Nzambi. Mwanjelo mmwambè, Davidì, mmwambè mu Misambu ne: “Wèwè udi muMupwekèshe ndambù kwinshi kwa Banjelo bàà mu Dyulu.” Mwanjelo kampànda ngwákamba ne Nzambi mmuMupwekèshe ndambù kwinshi kwa Mwanjelo, bwa kumònaYè mwa kuMwasa cifulu cya butùmbi; bwa Wàmòna mwa kukènga ne kulabula lufù, bwa kuzànjikiibwa Yè cyàkàbìdì. Bwa kumònaYè mwa kuMuvwija . . . kupyàna bintu byònsò bya pa buloba. [Katùpà kàà mukàbà wà mèyi munda mutupù—Muf.]

<sup>121</sup> Mpindyewu, mu—mu Maatàayi 28.18, mmutùdì tubala maalu aa. Paanyimà pàà Yèyè mumanè kupoopediibwa pa nkùrusè ne kubiika ku lufù mu ditùkù diisátù, Yèyè wàkatwilangana ne bayiidi Bèndè ne wàkabàtùma ne mudimu wà kuya pa buloba bujimà, bwa kuyiishabò cifùkiibwà cyònsò Evanjeeliyo. KwambaYè ne: “Makolè ònsò mu Dyulu ne pa buloba mmafidiibwe mu byanza Byanyi. Bukolè bwònsò mu Dyulu, bukolè bwònsò pa buloba, mbufidiibwe kùNdi.” Cìvwa ncinyi aci? Muntu ne Nzambi bààkadisanga. Logos wàkavwijiibwa musunya ne wàkashiipiibwa, ne wàkabiiika ku lufù bwa dibingishiibwa dyetu, ne ùvwa dîbà adi Emanùwèlè mwela maanyi bwa kashidi ne kashidi. Nzambi wàkashintulula cisòmbedi Cyèndè, kuumuka ku Nkwasa wa butùmbi mu bibwàshibwàshì mwàmwa, kulwa mu mwoyi wà Mwan’Èndè, Kilisto Yesu, bwa kusòmbelamù ne kukòokesha kashidi. “Nzambi ùvwa munda mwa Kilisto.” Yèyè ki cikishilu cya ndekeelu cya Nyuma.

<sup>122</sup> Nyuma wàkashàalakù mu ntentà, ditùkù kampànda, aci nudi bamanyè, mu ntentà. “Nenku Solòmò wàkaMwibakila nzùbu. Kàdi, pààbi, mutàmbe bunene wa mu Dyulu kàtu ùsòmbela mu nzùbù myasa ku byanza to.” “Nenku Wèwè wàkaNgenzela mubidi.”

<sup>123</sup> Mu Mukàndà wà Byenzedi, mu nshapità wa 7, pàvwàye wàkula, wàkamba ne: “Bòbò bònsò bààkadyànjila kuCimòna. BààkaMwibakila ntentà, Mòsà ngwàkiibaka, nguvwa ne ntentà, ne kutèekamù mushèètè wà cipungidi, bwalu Nzambi ùvwa pa Nkwasa wa Ngàsà. Yèyè kàvwa musòmbèlè mwòmò amu to.” Eyo.

124 Pashìishe ne: “Wèwè wàkaNgenzela mubidi,” mubidi wà Mukalenge Yesu Kilisto, mupwekesha kwinshi kwa Banjelo bwa kulabula lufù; ne kàyikù mukwabo to anu mutàmbe bunene wa mu Dyulu, Kilisto; Mfùmù wa Ditalala, Mfùmù wa bamfùmù, Mukalenge wa bakalenge, Mufùki wa mutooto wònsò wà mu cibwàshìbwàshì.

125 Éyì Nzambi! Wàkashààla kwinshì kwa bufùki Bwèndè, bwa Wàmòna mwa kupikula muntu (muntu wa kàyi nzùbu, kàyi pabwàsà), ne kumupèèsha nzùbu mu Dyulu. KushìyaYè matùmbi a mu Dyulu. KushìyaYè Dìnà dya ditàmbe kutùmbuka òwàku mwa kubìkidiibwa. Nenku pàvwàYe pa buloba, muntu kuMupèèshayè dìnà dya ditàmbe kushààdila òwàyekù mwa kuMupèèsha, wàmba ne: “Yèyè mmwànà mulela mu masandi’s, twamb’eku twamb’eku.” Mulelela mu cidìilù cya nyama, muswikila mu mikùsù ya bilàmbà myumusha paanyimà pàà cikòkedi cya ngombe. Kàyi ne mwaba wà kuya, kàyi ne kumbèlù kwa kuya. Ne Wàkabiikidiibwa ne “Beelèzèbùlà,” mfùmù wa baadémons. Wàkakèngeshiibwa. Wàkatwidiibwa makòdi. Wàkeleluidiibwa. Wàkabèngiibwa, ne wàkaya mu ciinà cya citàmbe kwikala cya mwinshi mule, ne wàkiinama bwa kupeta “mutàmbe kwikala mubi wa nkòtòtò wa ku bandumbà.” Ki cyàkaMwenzelà muntu ncyòci aci.

126 Kàdi Nzambi wàkaMubàndisha kuulu menemene mu mushindu wà ne bikèngela Àtangilè panshì bwa kumòna Dyulu. Muntu wàkaMupèèsha nkwasà wa mutàmbe kwikala wa panshì, kuMupèèsha mwaba wà mutàmbe bubì, dìnà dya ditàmbe kwikala dya panshì. Nzambi wàkaMubàndisha ne kuMupèèsha Nkwasa wa mutàmbe kutùmbuka, ne Dìnà dya ditàmbe kutùmbuka. Ki dishìlangana ndyòdi adi pankaci pàà cidì muntu mwenzè ne Mwànà wa Nzambi, ne cidì Nzambi mwenzè ne Mwànà wa Nzambi.

127 Yèyè wàkiinama, bwa twètù twamòna mwa kubàndishiibwa. Wàkalwa twètù, bwa ku ngàsà Wèndè twètù twamòna mwa kulwa Yèyè. Wàkalwa kùdi bàvwà kabàyi ne nzùbu, ne Yèyè mwine kulwa kàyi ne nzùbu, bwa twamòna mwa kwikala ne nzùbu. Wàkalwa kùdi babèèdi ne Yèyè mwine wàkavwijiibwa mubèèdi, bwa twamòna mwa kwondopiibwa. Wàkalwa kùdi ngènàmpèkààtù, “ne wàkavwijiibwa mpekaatu, Yèyè mwine,” bwa twamòna mwa kusungidiibwa.

128 Kabyèna bikèmesha to mwakazànjikiibwàYe. Kabyèna bikèmesha to mùdiYe Yèyè UdiYè dilòòlò edi ewu. Nzambi wàMuzànjiki, ne makolè ònsò mu Maulu ne pa buloba mmaMupèèsha.

129 Pààkamanà mudimu Wèndè wà pa buloba kujika, pànu pa buloba. . . Yèyè wàkalwa pa buloba, mMwenzè anu ùfika, mutooto wa mu dinda kwambawù mùvwàYe Mwànà wa Nzambi. Yèyè kunyùkusha démon ne démon yònsò uwvaYè ùtwilangana



nendè awu. Dìna dya Mukalenge dibeneshiibwè! Baadémons bàakazakala ne bàakanyükushiibwa, ne bàakasengeleela bàlòmba luse, mu Bwikadi Bwèndè. Eyowa's, mukalenge. Iferno mujimà wàkamanya ne Yèyè ùvwa Nganyi.

<sup>130</sup> Wàkenda mu didipwekesha, Kàyi ne mwaba wà kutèèkaYè mutù, mu bufùkù kampàndà bwa mvùla. Nyama miine yìvwàYe mufùke: “Nyuunyi ya muulu yidikù ne maswa, ne mikènge yidikù ne meenà, kàdi Mwànà wa muntu Kèna ne mwaba wà kutèèka mutù Wèndè mubènesha awu to.” Bushuwa's, s'ki mùvwàYe.

<sup>131</sup> Yèyè wàkalwa mpekaatu, wàkalwa mushàadile ne mulekelela. Kàdi démons yìvwa mimanyè ne Yèyè ùvwa Nganyi. Yàkasengeleela yilòmba luse. Yákamba ne: “Bwà cinyi Udi mulwè bwà kutùkèngesha kumpàlà kwà dìbà dyetu kadiyi dyanji kulwa?” Kàdi pàvwà bayiishi bàMubiikila ne, “Beelèzèbùlà, mwena lubùku apu,” démons yòyi yìvwa yìMubiikila ne, “Mwànà wa Nzambi udi ne mwoyi,” ne yisèngeleela yilòmba luse.

<sup>132</sup> Kaa, s'tudi bafwànyine kwimana anu kakese cyanàànà's wè! Wèwè udi nganyi's, twamb'eku twamb'eku? Mudimu wùdi wenza awu wùdi ne mushinga kaayi? Anyi kazùbù kakesèè katùdi naakù kàka kàdi ne mushinga kaayi? Kàshinyi katùdi naakù kàka kàdi ne mushinga kaayi?

<sup>133</sup> Wèwè mwànà mutèkète wa bakàjì, kaawèwè keena dipota aku, bulenga bùdi naabù abu bùdi ne mushinga kaayi mpindyewu? Nwènù nsongàalùmè yidi ne nsukì ya yikenka, mifinùnùke, ne makaaya malulàme abu, s'nwadyàkukòbama dìngà ditùkù, panwàkòbamà bwa bùngì bwa bidimu.

<sup>134</sup> Kàdi, Mukalenge àbeneshiibwè's wè! Wèwè ne musùkà wùdi mulediibwe cyàkàbidi. Newikalè ne mwoyi kashidi ne kashidi, bwalu Yèyè wàkavwijiibwa wèwè, bwa ku ngàsà Wèndè wèwè kuvwijiibwa Yèyè, ne kukulongolwelaYè mwaba.

<sup>135</sup> Kaa, twètù bàdi bèèla meeji ne tudi ne bilàmbà bya kwikala kushintulula, ne ndambù wa byàkudyà mu nzùbu abu, citùdi ki cinyi's? Nzambi's mmufwànyine kubyàngata mu kasùnsukila kàà kasunsa. Mweyelu wèbè mene's mmukwàta mu cyanza Cyèndè. Ne Yèyè munkaci mwetu bwa kwondopa babèèdi, bwa kwamba patòoke ne kujikula, ne kudyànjlila kwamba maalu, ne dìbà dyònsò anu mu byòbi. Ne ùditàcisha mene ne bwa kubiisha kaamushipa kakese ku lufù, kàvwà kafwè, munkaci mwetu. Yehowah mutùnyùngùlùkile, Yehowah munda mwetu, NDI munene ne wa bukolé awu.

<sup>136</sup> PààkafwàYe, kwelabò meeji ne bààkaMupeta. Yèyè kubànda mu iferno. PààkuumukàYe pa buloba ditùkù dyàkaMupoopelàbo pa nkùrusè adi, Wàkabwela mu myaba ya bajimìne. Bible mmwambè ne: “Wàkaya kayiisha misùkà yìvwà mu bùlokò, yìvwà kayiyi minyingàlale cikondo cya lutùulù, mu matùkù a Noà.” PààkafwàYe, ne Nyuma Wèndè kuMuumuka, Wàkalwa

cyàkàbìdì Logos. Yèyè, ndi mmòna's, wàkamba ne: “Ndi mufùme ku Nzambi. Ndi ngaalukila ku Nzambi.”

137 Ne Nzambi ùvwa Dikunji dya Kapyà dyàkalombolà bânà mu cipèèlà adi. Ne pàvwàYe pànu pa buloba. . . Nenku pàakafwàYe, Wàkaalukila cyàkàbìdì ku Bukênkè. Pòlò wàkaMumòna, ne Yèyè ùvwa Bukênkè. Nansha umwe wa kùdìbo kààkaMumòna to. Bààkamòna Pòlò ùdìshinda panshì. Cintu kampànda cyàkamutuuta, ne Cìvwa m'Bukênkè. Pòlò kwambayè ne: “Ùndi nkèngesha Nganyi?”

138 Ùvwa mwambè ne: “Shawùlà, Shawùlà, udi uNkèngesha bwa cinyi?”

Yèyè ne: “Nganyi Awu?”

139 Yèyè ne “M'Mémè Yesu, ùdi ukèngesha, ne mbikolè bwa wèwè kukàndamana.”

140 Pashìishe kuyayè kalonga Bukênkè abu. Pòlò wàkaalukila mu Bible, bwa kujandula cìvwà Bukênkè abu. Ki kufundayè Mukàndà ewu. Yèyè ùdi Yehowah umwèumwè awu. Bukênkè bumwebumwe abu mbùvwà mu cipèèla ne bânà bàà Izaleelà. Ne pàvwà Peetèlò mu bùlokò, Yèyè ngùvwa Bukênke bwàkabwelà ne kukàngula biibi abu.

141 Ne ku ngàsà Wendè, bwa muntu nansha umwe kàpeci pàà kubìngila. . . Kaa, bìikalakù mwa kupwà mwoyi baamisànjeelà bàdì kabàyi balongè kàlaasà aba, ne kuvùluka's: kî mmùsànjeelà awu to, m'Mukenji. Yèyè mmutùùlùke cyàkàbìdì, mulwè neetù, mu mmwènekelu wa Dikunji dya Bukênkè. Ne Yèyè ùdi ukwàta mudimu ne bishimà ne bimanyinu Byèndè bimwebimwe abi, kakùyì cintu nansha cìmwè cya kaciyi cya mu Bible to; mushààle anu mu Bible, mucilamè mu bukòokeshi, ùpàtula butùmbì Bwèndè patòòke, ùleeja bukolè Bwèndè. Dìnà Dyèndè dya cijila dìbeneshiibwè!

142 Ndi mumanyè ne nudi ne cyà kwikala nwela meeji ne ndi mupàle; kàdi, kaa, Diikisha dyà Cyendèlèlèlè dibènesha dìdì mu musùukà wànyì adi, bipeepèlè bikolè nànsha byòbì mwà kutuuta, lwongò lwànyì ndukwàcìle munda mwà cilàmbà cikùdika.

143 Ne pa kuMumòna pàakafwàYe, mu mushindu wà ne, ngondo wàkapeta disaamà dya mutù. Dìbà dyàkabwela mu nkànkala wa ditùkù. Ne pàakayàYe mu myaba yà bajimine, [Mwanèètù Branham ùdi ùtuuta bintu pa cyambilu—Muf.] wàkakookola ku ciibi, ne ciibi cyakunzuluka. Bible mmwambè ne: “Wàkayìisha misùukà yìvwà mu bùlokò, yìvwa kayìyi minyingalàle mu cikondo cya lutùùlù mu matùkù a Noà,” paanyimà pàà Yèyè mumanè kufwà pa buloba ebu. Mwanèètù wa balùme, mwanèètù wa bakàjì, pàakafwàYe, mudimu Wèndè wa pa buloba wùvwa mujikè, kàdi Ùcìvwa anu ukwàta mudimu. Ne Ùcìcìdì anu mu mudimu dilòòlo edi. Amen.

144 Wàkakookola ku biibi bya bajìmine. Bible mmwambè ne Wàkakookola. Ne Wàkafila bujaadiki ne: “Mémè ki Dimiinu dya mukàji adi. Ndi Ewu wàkambabò kùdi Adàmà awu. Ndi Ewu wàkambabò kùdi Henòkà ne neàlwe ne binunu dikumi bya bansantu Bèndè awu. Ndi Mwànà wa Nzambi udi ne mwoyi awu, kàdi nwènù nudi bajìmije ditùkù dyenu dya ngàsà ku dyanza dya mpekaatu. Kàdi bàkaavwa badyànjlile kunwàmbila, kùdi banjelo, Henòkà, Noà ne, Mwva ne cya kulwa bwa kuuja Dìyì ne Dìyì dyònsò dya Bible wa Nzambi. Ndi kaaba aka bu ntèmù mu ‘ditùngà dya bajìmine’ emu.” Ki kubàyiishaYè.

KupwekaYè too ne mu iferno, buludì too ne ku biibi bya iferno, kukookola ku ciibi. Dyabùlù kukàngulayè ciibi, kwambayè ne: “Mpindyewu Asààku masàlà ùbuukè.”

145 KumudyàpulaYè nsapì ayi ku mikàbà, kwamba ne: “Wèwè dyabùlù, udi mwenzè mikaaka ntàntà mule.” S’ki cyòci eci, anu mu Bible emu mene. Ndi nkùfika mu katancì kakese. “Udi mwenzè mikaaka ntàntà mule, kàdi Ngàalu bwa kwangata bukòokeshi.” KukwàtaYè nsapì ayi kàdi kumutuuta musèbà e kumusàkila munda amu, ne kukànga ku ciibi.

KulwaYè e kwangata Abraham, Izàkà, ne Yakòbò. Mu ditùkù diisàtù Yèyè kubiika ku lufù, ne aba bàvwà balàale mu lukità e kujuukabò pàmwè Nendè. Kaa, aleluuyah! Kabyèna bikèmesha to pàdì mwedi wa kasàlà mwambè ne:

Ne mwoyi, Yèyè wàkannanga; ùfwà, Yèyè wàkansungila;  
 Mujiikiibwe, Yèyè wàkangata mpekaatu yànyì  
 kuya kayishiya kule;  
 Ùbiika ku lufù, Yèyè wàkambingisha cyanààna  
 bwà kashidi:  
 Dìngà ditùkù Yèyè neàlwe—kaa, Ditùkù dyà  
 butùmbi.

146 Mwonji wùdì wùswikakajà myoyi yetu ne bwobùmwè bwa bwena Kilisto wùbeneshiibwè, dinanga dya Nzambi. PàakabiikàYe ku lufù, kakwàkajika Bwèndè Yèyè to, nansha nanku. Ùcivwa kabìdi ne mudimu wà dyanza.

147 Bible mmwambè ne: “Yèyè wàkabànda mu Dyulu ne wàkapèèsha bantu mapà.” Kùvwa cyuyùya kàmpàndà civwà cilembèlèle kuulu kwa buloba, cya mímimà, cya dibungama, cya lufù, ne dicyòka. Masambila kaàvwa mwa kubànda to, bwalu Difuta dya cibawu kadivwa dyenjìibwe to. Kàdi, Wàkaya dyàmwàmwà dya cilàmbà cikùdika aci. Wàkapenga njila. Wàkapanda cilàmbà cikùdika cya bubèedi. Wàkapanda cilàmbà cikùdika cya mpekaatu. Wàkapanda cilàmbà cikùdika cya dicyòka. Wàkapanda cilàmbà cikùdika cya dibungama dikolè. Wàkapanda cilàmbà cikùdika cyònsò, kusebeela mutàmbakanyi cibeeba, ùbànda mu cibeeba cya Mfùmù. Kaa, ekèlekèle, pàakapitàYe ngondo ne mitooto, wènda ùya anu kuya!

148 Paanyimà Pëndè, bàvwà bènda bàlonda, mbansantu bàà Dipungila Dikùlukulu, Abraham, Izàkà, ne Yakòbò. Bààkabànda buludì ne kubwelabò mu maulu a Dyulu. Pàcìvwàbo kule menemene ne Cimenga aci, ndi mwa kubàmòna bàtùpula mèsù muulu. Abraham kwambayè ne: “S’ki Cimenga cìmvwà mèmè ewu mujingèjinge bwa kumòna cyàcya. Kaa, lwàku apa, Izàkà. Lwàku apa, Yakòbò. Kaa, tuvwa beenyi ne beena lwendu bàà pa buloba, kàdi Cimenga aci’s ncyòci cyàcya. S’ki Cyòci citùvwà bindilèndile cyàcya.”

149 Ne Bible mmwambè ne bààkeela lubilà lukolè ne: “Ambùlùkaayi, nwènù biibi bya kashidi, ne ikàlaayi bambùlùke, bwalu Mfùmù wa Butùmbi nyawù ùbwela.”

150 Ki Banjelo bàvwà paanyimà pàà biibi abi kwandamunabò ne lubilà lukolè kùdi banjelo bàvwà paanyimà apa, kwambabò ne: “Mfùmù wa Butùmbi ewu Nganyi?”

151 Ki banjelo bàdi pambèlù apa, bapròfetà abu, kwambabò ne: “Mukalenge wa Bilwilu, Mukolè mu mvità.”

152 Ki kutwàbo mbòtà ne biibi binène abi kukàngukabi. Ki kutùlukaYè munkaci mene mwa misèsèsù amu, Mucìmunyi awu, mu bucìmunyi, ne bansantu bàà Dipungila Dikùlukulu bènda bàlonda paanyimà Pëndè. Musòmbe mu Nkwasa wa butùmbi, kwambaYè ne: “Taatù, ki bòbò aba’s. Mbèèbè Wèwè.”

153 Yèyè ne: “Bànda kùneeku ùsombè, too ne pàNgààvwijà beena lukunà Bèèbè bònsò citèèkedi Cyèbè cya makàsà.” Patùdi tubala, tudi tusangana aci mu Mifundù emu. Eyo

154 Tèèlejàayi. Mpindyewu utùdi mu mvensà wa 8 ewu:

*Pashìshe yèyè wàtèèki bintu byònsò mu bukòokeshi mwinshì mwa makàsà èndè. Bwalu . . . yèyè wàkatèèka bintu byònsò mu bukòokeshi mwinshì mwa makàsà èndè, kààkashìya cintu nansha cimwè cidi kaciyi . . . mwinshì mwèndè to. Kàdi mpindyewu katwèna tumòna . . . bintu byònsò bitèèka mwinshì mwèndè.*

Mbwena kwamba ne, lufù. Katwèna banjì kumònamù lufù to, bwa mpindyewu, bwalu tucidi anu tufwà. Tudi tumòna lufù.

Kàdi, mvensà wa 9: “Kàdi tudi tumòna Yesu!” Amen. Tèèlejàayi.

*. . . tudi tumòna Yesu, uvwa mupwekèshìbwe ndambù kwinshì kwa banjelo bwa bìsaamà bya lufù awu, mwashìbwe cifulu cya butùmbi ne luumù, bwa ku ngàsà wa Nzambi yèyè wàmòna mwa kulabula lufù bwa muntu yònsò.*

Wàkapwekeshiibwa kwinshì kwa Banjelo bwa cinyi? Bwa Wàmòna mwa kulabula lufù. Bìvwa bikèngela Áfwe. Bìvwa bikèngela Álwe, bwa kufwà.

155 Tàngilà kaaba aka, wêwè mulundà wanyì. Kùpu, kùpukù eci mwoyi to. Pàvwà Yesu wènda ùya, wènda ùbànda kakùnà apu, lufù lùvwa lùnyùnguluka lùMuvumina ku mutù vùùm vùùm vùùm.

156 Twàngatàayi cimfwànyì cyetu ku Yelusàlèmà, cya kùkaadi bidimu binunu bibidi kwàka. Ne mmunyì mùdiku mwa kuCìbènga's? Ndi ngumvwa mutooyi wènda wùlwila mu mùsèèsù amu. Ncinyì aci? Ncintu cyènda cìtuuta ntùntùntù panshì. Nnkùrusè wa kale mukàyàbàle awu wènda ùpweka, ùpàtuka mu biibi bya Damàsèkè, wènda ùtuuta panshì ntùntùntù pa nsàkàlàbwà apu. Nsàkàlàbwà minene ayi yìcidi ànkù. Ùtuuta panshì ntùntùntù pa nsàkàlàbwà minene ayi apu, ntù-ntù. Ndi mmòna dizòloloka dya Mashi mu mùsèèsù amu. Ncinyì aci? M'Muntu udi kàyì mwenzè bwalu bubì nansha bùm wè to; anu bwìmpè pa bwòbù. Bantu bàvwa mpofò. KabààkaMumanya to. KabààkaMujingulula to.

Wêwè udi wamba ne: “Mpofò? Bàvwa mwa kwikala ne lumònò lwàbò anyi?”

157 Udi anu mwa kwikala ne lumònò lwebe alu kàdi mwikàle mpofò. Nudi nwitabuuja nanku anyi? Bible ngudi mwambè nanku. Nudi bavùlùke Elishà mu Dotànà mwàmwa anyi? Wàkapàtuka ne kufofomija bantu abu, kwamba ne: “Mpindyewu ndondàayaaku.” Bàvwa mpofò kùdiye.

158 Nenu bantu's bàdi mpofò dilòlò edi. Ekeleeziya kampànda udi kàyì wítabuuja dyondopa dya kùdi Nzambi, kulwabò tàmakàtàmakà too ne kùndì musangu kampànda, bàmba ne: “Mvwijààku mpofò. Mvwijààku mpofò.” Kùvwa nkwa Mwanèètù Wright. Yèyè ne: “Mvwijààku mpofò.” Yèyè ne: “Pòlò's wàkavwija muntu kampànda mpofò, musangu kampànda.” Yèyè ne: “Mvwijààku mèmè mpofò.”

159 Mèmè ne: “Mulundà wanyì, dyabùlù's nyawù ùkaadi mumanè kucyènza. Wêwè's ukàadi mumanè kwikala mpofò. Bushuwa's, s'ki cyùkaadi.”

160 Yèyè ne: “Ondàpaaku mwànà mukese wa bakàjì ewu nenku nènkwitàbùùjè.”

161 Mèmè ne: “Sùngila wêwè ngènzàmpèkààtù wàwa nenku mèmè nènkwitàbùùjè.” Cya bushuwa's.

162 “Kaa,” mwàkambàye, “bikèngela yèyè itabuujè's.”

163 Mèmè ne: “S'mbya mwomùm wè kaaba aka, bikèngela cùikalè mu ngàsà mudìshikàmìne wa Nzambi.”

164 Dyabùlù, nza—nzambi wa buloba ebu awu, mmufòfòmìje mèsù a bantu. “Bàdi ne mèsù kàdi kabèèna bàmòna to,” mùdì Bible mwambè.

165 Ki Yèyè awu, wènda ùbànda ne mùsèèsù, wènda ùdikòka ùshìya bidyacilu bya makàsà ne Mashi mu kubàndà kwa mu njila aku. *Lubùlùbùlù* lwà lufù lùvwa mu dinyùnguluka amu

lùMusùma, lùMuvumina ne: “Anu mu katanci kakese cyaànà emu’s mèmè nènKupetè.” Yèyè ùkaavwa wènda ùteketa, mwikàle ne nyòòtà ya màyi.

<sup>166</sup> Musangu kampànda bàkangaasa cingoma, mulààle panshi apa mu mpàta, mashi miikàle anu àzòlòloka. Mèmè kwela lubilà lukolè ndòmba màyi. Ki mulundà wanyì kuyayè lubilu, kwangatayè cifulu cyèndè e kucyèlayè mu màyi; màyi a kalè a matèngèbèle awu, ne tusàndà mu màyi awu. Kulwayè, ki mèmè kutùbula mukana; kucikàmayè. Bwalu, mashi àvwa àzòlòloka byenzè bu mushimi’s, mwaba wùvwàbo bangaashile cingoma basùnsùle awu. Nyòòtà kaayi!

<sup>167</sup> Dìbà adi ndi mmanya cìvwà Mukalenge wanyì ne cya kwikala mushààle, paanyimà pàà mashi mazòlòlòke dinda dijimà adi, kuumukila pa dìbà citeema too ne pa dìbà isatu wa dilòòlò, mwikàle ùjìmija Mashi búngì nanku. Ndi mmòna mùzàbì Wèndè, dyàmbedi, byenzè bu tuumatobà tukese tukese pòpò. Ki tuumatobà atu kubangatù twènda tudyunda twènda tudyunda ne kudisangatù, kwenzatù ciidikeji cinène menemene cya Mashi, cìMutuuta ku mukòlò pàvwàYe wènda ùya apu. Àvwa m’Mashi a Èmanùwèlè. Kaa, buloba kabùvwa buÀkùmbànyìne to.

<sup>168</sup> Kàdi pàdiYe wènda ùbànda apu *lubùlùbùlù* elu munkaci mwa kuMusùma. Lwàkenza cinyi? Ndekeelu wa byònsò kuMusùmalù’s.

Kàdi, mwanèètù, muntu wetù kanà yònsò ewu mmumanyè ne, cìshì kampànda anyì lubùlùbùlù, lwòlò anu lukusùme musangu wùmwè, bwa disùmangana dyàlù bwàjiki. Kalwèna mwa kusùmangana kabidi to. Bwalu, pàdìlu lùùmuka, lùdi lùtùùla kalonda kààlù.

Ki bwa cinyi byàkakèngela bwa Nzambi kuvwijiibwaYè mubidi. Wàkangata kalonda kàà lufù mu mubidi Wèndè, ne Wàkatùla kalonda kàà lufù aku. Dìnà dya Mukalenge dìbeneshiibwè! Lufù lùdi mwa kuvuma ne kusùma, kàdi kalwèna mwa kukwenzela bwalu to.

<sup>169</sup> Pòlò, pààkuumvwayè *lubùlùbùlù* alu lùvuma lùmnyungulukila, lufù ndùvwà lwènda lùlwa alu. Kwambayè ne: “Éyì lufù, kalonda keebe kàdi penyi?” Úwa mwa kufunkuna ku Kalvariyo kuvwàku kashààle mu mubidi wà Èmanùwèlè. “Bucìmunyi bwebe bùdi penyi? Kàdi twasàkidila kùdi Nzambi udi utùpèeshila bucìmunyi ku Mukalenge wetù Yesu Kilisto. Eyowa.

<sup>170</sup> Katùtu tumòna bintu byònsò to.

*Kàdi tudi cya bushuwa tumòna Yesu, yèyè wàkapwekeshiibwa ndambù kwìnshì kwà banjelo bwa . . . dikèngà dya lufù, . . .*

*Bwalu bidi bikùmbàne bwèndè yèyè, yèyè mwena bintu byònsò—byònsò, bwa ku yèyè ncutùdi ne bintu*

*byònsò, mu ntwàdijilu . . . bânà bàà balùmè bààbúngì . . .  
ne muvwijìibwe kápíteenà munene wa lupàndù  
lwetu . . . ku dikènga.*

Mushindu wùmwèpelè wùvwàYe mwa kulwa Kápíteenà wa lupàndù lwetu, bìvwa bìkèngela Àkèngè.

171 Tèèlejàayi Méyì malenga aa kaaba aka mpindyewu. Tèèlejàayaaku mpindyewu.

*Bwalu ne yéyè udi ujidilangana ne aba bàdi bàjidìibwe  
bàdi bónsò . . . umwe: . . .*

Kaa, kanwènaayikù numòna Mwonji wà mvinyò ne ditàmbà mwaba awu anyi? Bónsò Umwe.

*. . . ki cidì cyènta ne yéyè kèna ne bundù bwa  
kubiikidiibwabò ne mbânà bàábò to.*

Nwamònu anyi? Bwa cinyi? Tèèlejàayi, mvensà udi ulonda awu.

*Wamba ne: Némmanyishè dìnà dyebe kùdì bânà bèètù,  
munkacì mwa ekeleeziya mèmè nènkwimbìle mèyì a  
dikusaamuna naawu.*

*Kabidi ne: Nèntèkè dyeyemena dyànyì kùdiye.  
Kabidi ne: Mònaaku ne ki mèmè ewu ne bânà baùdì  
wèwè mumpèèshe.*

*Bwa bwalu abu dîbà adi bu mùdibi ne  
bânà mbaabanyanganyi bàà mubidi ne mashi,  
bya mwomùmwe yéyè mwine pèndè wàkalwa  
mwabanyanganyi wa byòbì bimwebimwe abi, bwa ku  
lufù lwèndè alu yéyè wàmòna mwa kubùtula ewu udi  
ne bukolè bwa lufù, mbwena kwamba ne, dyabùlù,*

*Ne kusùngila aba bàdi ku . . . bwa . . . ku . . . bwa lufù  
bàvwà misangu yònsò anu balamina mu bukòokeshi mu  
bupika.*

172 Muntu uvwa misangu yònsò anu ne bwòwà bwa lufù. Kilisto wàkalwa mpekaatu, wàkapwèkeshiibwa, bwa kwambulaYe lufù pambidi Pèndè. Ne Yéyè kèna ne bundù bwa kubiikidiibwa “Mwanèètù” to, bwalu Wàkateeciibwa anu mutùdì twètù tuteeciibwa emu. Ne Yéyè ùdi mwa kwenza . . . kwikala mutwàkwidi wa mushindu mujaalàme, bwalu Yéyè wàkatwàla diteeciibwa dya mushindu anu wumwewumwe dyùdì wèwè utwàla adi. Nenku Yéyè wàkangata kaaba keebe, mwikàle mumanye ne kuvwakù mufwànyine kukàngata wèwè mwine to.

173 Pa nanku, mwanèètù wa balùme, mwanèètù wa bakàjì, kwènàku umona anyi? Cintu cyònsò mu kaabujimà nngàsà. Cyònsò nkòòng nngàsà. Kî ncyùdì wèwè wenza to, nansha bya munyi. NcikaadiYe Yéyè mumanè kukwenzela. Mpindyewu, wèwè kwèna mwa kwenza cintu nansha cimwè bwa kukùmbanyina lupàndù lwebe to. Lupàndù lwebe ndipà. Kilisto

wàkalwa mpekaatu, bwa wêwè kulwa mwakàne. Nenku Yèyè ùdi Kàpíteena Munene wa mushindu mujaalàme bwa lupàndù lwetu, bwalu Yèyè wàkakènga anu mutùdi twètù bakènga emu. Wàkateeciibwa anu mutùdi twètù tuteeciibwa emu. Ne Yèyè kènà ne bundù bwa kubìkidiibwa ne “Mwanèètù twètù” to, bwalu Yèyè mmumanyè bitùdi tucipila. Kaa, Dìna Dyèndè dibeneshiibwè’s!

*Bwalu ncyà bushuwa ne yèyè kààkangata mmwènekeli wa banjelo to, kàdi wàkangata wa dimiinu dya Abraham pambidi pèndè.*

<sup>174</sup> Kaa, ekèlekèle! Yèyè kààkalwa Mwanjelo to. Wàkalwa Dimiinu dya Abraham. “Nenku twètù, biikàle bafwè mu Kilisto, tudi tuvwàla Dimiinu dya Abraham, ne tudi bapyànyi bilondèshile mulayi.” Nwamònu anyi? Yèyè kààkangatakù mmwènekeli wa Mwanjelo to. Yèyè kààkalwakù Mwanjelo to. Yèyè wàkalwa Muntu. Wàkalwa Dimiinu dya Abraham, ne wàkangata kalonda kàà lufù mu mubidi Wèndè Yèyè mwine, bwa kutùpungisha ne Nzambi, ne mpindyewu mmusòmbe mwàmwa bu Mutwàkwidi. Ekèlekèle, mmunyi mutùdiku bafwànyine kuCibènga’s, wêwè mulundà wanyi?

<sup>175</sup> Tèelejààyi.

*Ki bwa cinyi mu maalu ónsò bìvwa ne mushinga kùdiye bwa kuvwijùbwayè mufwànàngàne ne bânà bààbò, bwa wàmòna mwa kwikala mwakwidi munene wa luse ne lulamatu mu maalu àdi àtàngilà Nzambi, bwa kwenza dipungisha . . . bwa mpekaatu wa bantu.*

<sup>176</sup> Bwa Wàmòna mwa kwikala Mupungishanganyi! Nwamònu’s, kùvwa lukunà pankacì pàà Nzambi ne muntu. Ne muntu nansha umwe. . .

Bààkatùma banjelo, bapròfetà. Bòbò abu kabàvwakù mwa kwangata kaaba keebe to, bwalu bìvwa bikèngela bwa kusambilabò bwabo bòbò biine. Kabàvwa mwa kwangata kaaba aku to.

<sup>177</sup> Dìbà adi, Yèyè wàkatùma mikenji. Mikenji yìvwa mpùlushi uvwa utwèla mu nzùbu wa lukànu. Kayìvwa mwa kutùpàtulamu to. KutùmaYè mikenji.

KutùmaYè bapròfetà, kutùmaYè baakàne, ne bikwabo byònsò, kabiyikù mwa kwenza difuta dya cibawu to. Kàdi Yèyè kutùluka ne kulwaYe umwe wetù. Kaa, ekèlekèle!

<sup>178</sup> Ndi njinga bwa twikalèku ne dìbà dyàbùngì mpindyewu mene, ndi muswè kuya neenù too ne ku mukenji wa bupikudi awu; kàdi katwèna ne dìbà to, kàdi anu bwa katancì kakese cyanààna. Cimfwànyì cilenga cìdi mu Luutà ne Naòmì. Bu nwènù mwa kumònamù, dipungisha, mushindu wùvwà mwena budimi, muntu uvwa ne cya kupikula bintu bìvwa bijìmine ne biyè abi awu, bìvwa bikèngela kwikalayè cilongo kùdi muntu



uvwa mujìmije bintu byèndè awu. Ki bwa cinyi byàkakèngela bwa Boàzà kwikalayè... ùvwa cilongo kùdi Naòmi, bwa wàmòna mwa kupeta Luutà. Ne pashiishe, bìvwa bìkèngela bwa kwikalayè mukùmbànyìne. Bìvwa bìkèngela bwa kwikalayè mukùmbàne bwa kucyènza, bwa kupikula bìvwa bijimìne. Nenku Boàzà, ku ciibi cya cimenga, wàkafila bujaadiki bwa bantu bònsò bitwilàngàne, pa kukòpola kwa cisàbaatà cyèndè ne, yèyè wàpikùlù Naòmi ne byèndè byònsò. Ne bìvwa bìkèngela ikalè cilongo.

179 Nenku ki bwa cinyi byàkakèngela bwa Kilisto, Nzambi, àlwe cilongo kutùdi twètù. Nenku Wàkalwa pànu ne ùvwa Muntu. Ne Wàkatwàla diteeciibwa. Ne bààkaMuseka, kuMwelulwila, ne kuMukèngesha, ne kuMulèngulula, ne kuMubiikila “Belèzèbùlà,” ne—ne kuMupeetula, ne wàkatwàla dinyooka dya lufù. Nwamònu anyi? Byàkakèngela kwikalayè cilongo kutùdi. Byàkakèngela bàMushimìnyìnè maalu, bwalu wèwè mbakushimìnyìne maalu. Byàkakèngela Àmbulè mabèèdi, bwalu wèwè udi mubèèdi. Byàkakèngela Àmbulè mpekaatu, bwalu yìvwa mmpekaatu yebe wèwè. Ne byàkakèngela Àlwe cilongo. Mushindu wùmwpelè wùvwàYekù mwa kutùpikula wùvwa ngwà kwikala cilongo kutùdi. Ne mushindu wàkalwàYe cilongo, mpa kuvwàlà kwà mmwènekulu wa mubidi wà bubi ne kulwa umwe wetù. Ne mu cyòci aci, Wàkafuta mushinga ne kutùpikula e kutwàluja mu bwobùmwe bwa Taatù. Kaa, Musùngidi kaayipu’s wè! Mèyì kì mmafwanyìnekù kubyàmba to.

*Bwalu mu bìdiye yèyè mwine mukènge mwikàle mukòokeshà. . . ne mukùmbàne bwa kulwa kukwàcisha aba bàdi bateeciibwe.*

180 *Kulwa kukwàcisha* mbwena kwamba ne “kuumvwilangana luse.” Bìdi ne, cidi cyenzè ne Yèyè àlwe cyòci *eci*, mbwà wàmòna mwa kuumvwila luse wèwè udi. . . udi ne èbè *mabika* ne *mala* awu, ne ntàtù yebe ya mikese ya *munda* ne ya *pambèlu*, ne mateeciibwa èbè ènda àdyunda mu mushindu wà uàtwàla anu ne lutàtù. Yèyè mmumanyè mwa kuumvwila luse. Yèyè mmusòmbe mwàmwa, bwa kwakwilangana. Mmusòmbe mwàmwa, bwa kukunanga. Ne nansha mùdi upàmbuka amu, Yèyè kàakukulekelakù to. Neàtungunukè anu ne kukulonda ne kukookola ku mwoyi wèbè. Kakwèna muntu mutwè cimpingà mu citanda emu udi kàyi mumanyè ne Nzambi ùtu ùkookola ku mwoyi wèndè ku ditùkù ne ku ditùkù eku to. Ne Yèyè neacyènzè anu kucyènza paucidi anu wa cifwàkà pa buloba ebu apu, bwalu Yèyè mmukunangè. Mmukupikùle.

181 Beedi bàà tusalà mbateetètètèete, bafùndi bàà mikàndà bàdi bàteeta, muntu ùdi ùteeta bwa kwamba patòoke cyena-bwalu cya “dinanga,” kàdi kaciyikù mwa kupeteka mu byakwidi bya buntu nansha. Umwe wàkamba ne:

Kaa, dinanga dya Nzambi, mushindu mwine  
wùdidi dibanjike ne dikezùke's wè!  
Mushindu mwine wùdidi kadìyi kwondola  
kumana ne dikolè!  
Neditungunukè ne kwikala kashidi ne kashidi,  
Musambu wa Bansantu ne Banjelo.

Bu twètù mwa kuuja mbû ne mâyi a mufùndu,  
Ne bu maulu mwa kwikala mavwijìbwe  
mukàndà movùnga;  
Cituuta cyònsò pa buloba ciikàle kasàlà,  
Ne muntu yònsò mwikàle bu ne wèndè mudimu  
mbu mufùndi;  
Bwa kufùnda dinanga dya Nzambi wa muulu  
Mbifwànyine kukàmisha mbû;  
Anyi mukàndà movùnga awu kawùyikù  
mufwànyine kukùmbanawù byònsò to,  
Nansha wòwò mwolola eku ne eku kwa dyulu.

182 Kwàdyàkuumvwakù to. Kakwènakù mushindu wà twètù kuumvwa mùdì didìfila dinene, dyàkenzàYe adi to, mulwè pa buloba ne mutùpungìshe ne Nzambi. Pashìishe kwalukilaYè e kwamba ne: “Mpindyewu, Ncyàkunùshìya kanùyì ne busàmbi to. Nèngàalukilè bwa kwikala neenù, munda mwenu mene, too ne ku ndekeelu kwà buloba.”

183 Nenku's ki twètù aba leelu ewu, biikàle ne mwoyi ku cikondo cya nshìikidilu, ne Yesu umwèumwè awu, ne bintu bimwebimwe abi, bimanyinu bimwebimwe abi, maalu a kukèma àmwèàmwè awu, lupàndù lumwelumwe alu, Nyuma umwèumwè awu wènzà bintu bimwebimwe abi, Evanjeeliyo umwèumwè awu, Dìyi dimwedimwe adi, bifwànyikijilu bimwebimwe abi, mamwèneshiibwa àmwèàmwè awu, bintu byònsò. Mbya mushinga kutùdi bwa katùlèngululu lupàndù lunene elu to, bwalu netwikalè ne cya kulumbulula, dîngà ditùkù, bwa citùdi twenza ne Mwànà wa Nzambi.

184 Yèyè ùdi pa cyanza cyebe dilòlòlò edi, wèwè ngènzàmpèkààtù, wèwè udi mutwè cìmpingà awu. Ciwikalà mwa kwenza Nendè ncinyi? Wèwè udi wamba ne: “Ee, nènCilààdikijè bwa musangu kumpàla.” Kàdi, vùlukà ne, kwènjikù nanku to. Kakwènakù mushindu to, nansha kakese, pawikalà ngènzàmpèkààtù, wà wèwè kuumuka mu citanda emu kàdi kushàala wa mwomùmwe to. Kwèna mwa kucyènzakù to.

185 Pilaatù, bufùku kampànda, wàkateeta kucyènzà. Wàkalòmbesha mâyi ne kwowayè byanza. Kwambayè ne: “Ncyèna ne bwalu naaCì to. Bìdi anu bu ne ncitukù muCimòne kacya to. Ncìtukù mwanjì kuumvwa Evanjeeliyo to. Ncyèna muswè kwikala Nendè bwalu to.” Yèyè ùvwakù mufwànyine kuCyùmusha ne dyowa dya mâyi ku byanza anyi? Nansha.

186 Ndekeelu wa byònsò, nudi bamanyè cyàkenzekelà Pilaatù anyi? Wàkajimija lungènyi. Ne mu Suisse mwàmwa, mutùvwà cidimu cishààle eci, tuyiisha Evanjeeliyo, patùdi twakulangana apa kùdi mwanu mwela wa kale, mwambè ne, kùdi dijiba dya màyi muntwamu, kùdi bantu bàlwa bàfùmuna pa buloba bujimà, bàlwa kubandila, ku cidimu cyònsò, mu cikondo cya dipoopediibwa dya pa nkùrusè. Pilaatù, wàkadyèlamù e kufwàye, mu kudishebeya, kutùpika e kudyèla mu màyi ne kudishebeyamu. Ne ku cidimu cyònsò, ditùkù dimwedimwe adi, màyi a bleu àdi àsàba àpàtuka mu dijiba adi, bwa kuleeja ne Nzambi wàkabènga màyi awu. Màyi kaènakù mwa kusukula Mashi a Yesu pa byanza byebe anyi ku musùukà wèbè nansha. Kùdi mushindu anu wùmwèpelè wà kucyènza, nkuCìitaba bu difwidiibwa dyebe sungasunga dya luse ne kupungishiibwa ne Nzambi.

Tùsambilàayi.

187 Taatù wa mu Dyulu, tudi tuKwela twasàkidila dilòòlò edi bwa Dìyi. “Bwalu diitabuuja didi difùma ku ditèeleja, ku ditèeleja dya Dìyi.” Tudi tuKwela twasàkidila bwa Yesu. Ne patùdi tumòna ditùkù dinene ditùdi ne mwoyi edi, mùdi bimanyinu ne maalu a kukèma, mushindu wutùdi tulekela maalu aa àtùfinuka àya. Nzambi, tàbajàku mèsù a bantu mu tabernacle ewu, dilòòlò edi, bwa bàmonèku ne bùmvwè ne mu mèbà a ndekeelu mmutùdi emu. Dìbà ndyedi dyasè lubilu. Katùcyèna kabidi ne dìbà dyàbùngì dya kwikala kaaba aka to, ne nebikengelè bwa twamònakù Yesu. Ne netwikalè ne cya kubadiibwa bu batungidyanganyi, bwalu kakwènakù kabingila to. Mu dinda emu, pawáfidi cikèènà-kumòna cinènè, cya bukolè aci, cya muntu uvwa ne cya kulwa kaaba aka aci, ùfùmuna ku ditùngà dya kule dyàdya; ne pa kumòmuna, kakùyi mpatà nansha mikese to, ùjuuka mu dikalù dya balèmà adi, ùpeta lumònò lwèndè. Mikòlò yèndè kukolakana, wàkòsololu citanda cijimà, wènda ùcyònkomoka ne ùtùmbisha Nzambi. Bìdi bileeja ne Nzambi ùcidi anu ne bukolè bwa ku mabwe aa kujuudila Abraham bàna. Pa kumòna bikèènà-kumòna, mwàkamba Yesu ne: “Ncyèna ngenza cintu nansha cìmwè Taatù kàyi muNdeejè to. Ncyèna mwa kwenza cintu nansha cìmwè to.”

188 Bampofò bààkaMulonda, kwambabò ne: “Ikàlàku neetù luse.”

189 KwambaYè, kulengaYè mèsù àbò e kwamba ne: “Bilondèshìle diitabuuja dyenu, bìnwènzèkèlè nanku.”

190 Mpindyewu, Mukalenge, twètù tudi tumòna Yesu. Katwèna tumòna bintu byònsò to. Tudi tumòna ne tucidi anu tukafila bansantu beetu ku nkità, ne twendela pa nkità ya muntu ne mukwèndè. Kàdi twètù tudi tumòna Yesu, wàkafila mulayi awu. Tudi tumòna mùdiYe neetù. Kàyi Yesu mu lukità to, kàyi Yesu wa kùkaadi bidimu binunu bibidi to; kàdi Yesu dilòòlò edi,

udi neetù awu. Tudi tuMumòna mumwèneshiibwe mu bukolè Bwèndè bwònsò, ne bimanyinu, ne maalu a kukèma.

191 Nzambi, swàku bwa katùlènguludikù Lupàndù lunene elu to. Kàdi swàku tùLúpùkile, ne tùLwítàbè, ne twikalè ne kaneemu, ne twikalè ne mwoyi ku Lwòlò too ne ku ditùkù dyàlwà Yesu kuya neetù Kumbèlu. Enzàku nanku, Mukalenge. Tudi tulòmba nùnkù mu Dìna Dyèndè.

192 Ne patùcidì ne mitù yetu miinyika apa, ndi ndìkonka ní kùdikù muntu mu citanda emu dilòòlò edi, mu Bwikadi bwa Nzambi bwa Nyuma Mwìmpè emu, mufwànyinekù kwamba ne: “Mwanèètù Branham, mèmè ndi mutwishiibwe ne ndi mupìile. Ndi mutwishiibwe ne ndi mupìile. Nzambi wàmбуulwìdì mpekaatu yànyì. Ne ndi mumanyè ne ndi mupìile. Nèngèlè cyanza cyànyì muulu kùdìYe ndòmba luse, dilòòlò edi. Nzambi, ikàlàku naanyì luse. Ndi mupìile.” Udikù mufwànyine kwenza nanku anyì?

193 Patùdì twanji kwindila anu mu katancì emu apa, kwòkò muntu kaaba aka udi muswè kwamba nanku, kùdi dibàtiizangana diikalà mwa kwenzeka anu mu katancì emu. Ne pawikalà ngènzàmpèkààtù, bu mèmè wèwè ndi mufwànyine kunyingalala. Mmunyì mùdìku mwa kubènga dinanga dya kadiyi kufwànyikija dya Ewu wàkafwà awu? Nzambi wa mu Dyulu wa cijila wàkalwa Muntu mubiipe; kabìyi ne Yèyè wàkenza mpekaatu to, kàdi mbwalu Ùwua ne mpekaatu yebe wèwè, ne muyàmbùle muyè naayi too ne ku Kalvariyo. Ne wèwè kùyikù muswè kwitaba dikufwilà dya luse adi anyì? Kwènàku muswè kuciitaba dilòòlò edi anyì? Patùcidì ne mitù yetu miinyika apa, muntu kampàndà àmbèku ne: “Ùmvùlùkèku, Mwanèètù Branham. Nyewù ngeela byanza byànyì muulu kùdì Kilisto, ngamba ne: ‘Ikàlàku naanyì luse. Ndi—ndi mupìile, ne ndi muswè kupungishiibwa ne Nzambi.’” Udikù mwà kwela cyanza cyèbè muulu anyì?

Eyo, piikalàbi ne bantu bònsò mbeena Kilisto, díbà adi, túsambilàayi.

194 Taatù, tudi tuKwela twasàkidila dilòòlò edi, mùdì bantu bònsò mwab’ewu biikàle beena Kilisto, mwáfìdibò bujaadiki bumwebumwe abu mu kushààla bapùwe, mùdì mpekaatu yabo yònsò mwinshì mwa Mashi. Nenku ndi ne kusàkidila kwàbùngì bwa bwalu abu. Bàbènèshèku, Mukalenge. Kaa, ndi ne disànkà dyàbùngì mùdìbo bapetèle dipungisha ku mulàmbù wà Mashi, ku ditèeleja dya Dìyì. Dyoweshiibwa dya ne màyì, ku Dìyì, ki Didì ditùkezulà. Didì ditùfikisha ku mwaba wà mutàmbe bunene, kùdì—kùdì ngènzàmpèkààtù, ne mídimà yèndè mibyàmbyàlè ayi, ùvwijiibwa mutòòke zee bu nêjè. Makeji makünze a mpekaatu àsukùdiibù, ne tukàadi bifùkiibwà bipyabipyà mu Kilisto. Mushindu mwine wutùdì tuKusàdila, Wèwè, bwa cyòci eci’s.

Mpindyewu mudimu wa dibàtiiza wàsemènyì. Ndi ngumvwa ne inàbànzà mutekète ewu, dilòòlò edi, ùdi ne cya kubàtijiibwa kaaba aka, mu Dîna dya Mukalenge wendè.

195 Éyì Taatù wa mu Dyulu, tudi tulòmba bwa Ûbeneshèku nsongaàkàjì ewu. Mushindu mwine wùdì meeji àányi àpingana anu paanyimà kùkaadi matùkù makese cyanààna's wè, pàmvwà ndwa mu Henryville ne mmòna mwànà wa bakàjì mukese mulenga wàwa wènda wèndakana mu mùsèèsù. Kàdi dilòòlò edi, ùkaadi maamù, inàbànzà. WàKwitàbì bu Musungidi wendè sungasunga. Nsòmbelu mmukolèle mwànà awu, Mukalenge, Éyì Nzambi, kàdi Dyulu ndya cya bushuwa bwèndè yèyè. Nenukù tudi tuKusàkidila bwa bwalu abu. Tudi tulòmba, Nzambi, bwa Ûbeneshèku nsongaàkàjì ewu mpindyewu. Ne pàdiye ùlwa bwa yèyè kubàtijiibwa mu màyi apa, swàku Ùmuujè téntè ne Nyuma Mwímpè wa Nzambi. Enzàku nanku, Mukalenge. Swàku bwa musùukà wèndè wùtupikè anu ne disànka, wùbwelè mu Maulu! Enzàku nanku bwa butùmbi Bwebe. Tudi tulòmba nùnkù mu Dîna dya Yesu. Amen.

196 [Katùpà kàà mukàbà wà mèyì munda mutupù—Muf.] Ndi muswè kubala mu Byenzedi, nshapità mwi2; Peetèlò ngudi wakula, mu Ditùkù dya Mpenta, dibàtiiza dya nzànzànzà dikaavwàku dyenjiibwe kacya mu Ekeleeziya wa beena Kilisto. Peetèlò, ùtândisha Bàfaalèsà ne bampofò abu, bwa dibènga kujingulula Mwànà wa Nzambi; wamba mùvwà Nzambi muMubiishe ku lufù, ne mujaadike byenzedi Byèndè, mu bimanyinu binène ne maalu a kukèma. Tèèlejàayi eci, pàvwàye wàkula apu. Ùvwa ùzànjika Yesu.

197 Nyuma wa mwena Kilisto yònsò ewu ùdi ùzànjika Yesu, kaciyi anu ne mishikù yebe nkààyaayi to, kàdi ku nsòmbelu webè. Mishikù yebe yidi mwa kwamba cintu, nsòmbelu webè wènzà cya cyanààna. Wèwè wènzà nanku, udi mumanyè ne ncinyi? Ndubombo. Kàdi mbipiciibwe ne kukùngamangana ne Dyulu bu mwena dyabùlù pamutù pàà bu mwena lubombo. Ndi mufwànyineku kwikala ne mpùngà mwímpè, ngeela meeji, mu Dyulu, bu—bu mwena dyabùlù, kutàmba bya mwikàle mwena lubombo. Ncya bushuwa ne ndi. . . Wèwè ufidila Yesu bujaadiki wamba ne “Yèyè m’Musungidi,” ikàlà ne nsòmbelu awu, bwalu bantu nebàcitékèmenè kùdì. Ncya bushuwa's. Ikàlà ne nsòmbelu uvwa ukèngela mwena Kilisto kwikalayè nendè. Twàkenkèci aci mu dinda emu.

198 Mpindyewu, bu Mukalenge mwa kwanyisha, màalabà dilòòlò, anyì. . . mu diisàtù dilòòlò, netwàngatè nshapità mwi3 ewu, udi nshapità wa ùkèmesha. Nenukù mpindyewu, ikàlaayi batwishiibwe bwa kulwa mu diisàtù dilòòlò. Mbanganyì bàdi Mukàndà ewu ùsànkisha, wà dilongesha edi dya kàlaasà kàà Dyàlumingu? [Disangisha didi dyàmba ne: “Amen.”—Muf.] Kaa, twasàkidilaayi wabùngi. Abi mbímpè.

199 Mpindyewu, ndi muswè kubala mpindyewu mu Byenzedi, nshapità mwi2, kubangila ku mvensà wa 32.

*Yesu ewu udi Nzambi mubiishe ku lufu, utùdi... bantèmù. (Bàvwa bacimanyè.)*

*Ki bwa cinyi mubàndishiiibwe kùdi dyàbalùmè dya Nzambi, ne mupetè kùdi Taatù mulayi wà Nyuma Mwimpè, Yèyè ngudi mwicikije eci, cinùdi nwènù numòna ne nuumvwa mpindyewu eci.*

200 Mpindyewu tèlèjaayi mùdiye wàkula bwa Davidi, umwe wa ku banjelo awu.

*Bwalu Davidi kàakabànda mu dyulu to, kàdi wàkamba yèyè mwine ne: MUKALENGE mmwambile Mukalenge wanyi ne: Sòmba ku dyàbalùmè dyànyi,*

*Too ne pângààvwijà beena lukunà beebe citèekedi cyèbè cya makàsà.*

Davidi kàvwa mwa kubànda to; yèyè ùvwa mwinshì mwa mashi a ngombe ya nkùngùlù, ne a mbùji, ne a mikooko. Kàdi mpindyewu yèyè ùvwa mwa kubiika ku lufu; ùkaavwa mwinshì mwa Mashi a Mukalenge Yesu. Bwalu bôbò bàdi bándamuna ku Mashi awu anu pàvwàWu mwa kulwa mu bukolè. Pàkalwà Mashi a Kilisto mu bukolè, bònsò bàvwà bafwè mu ngiikàdilù wa baanyishiiibwe abu, bàakabiika ku lufu, ncyà bushuwa, ne bàakabànda mu Butumbi.

201 Tèlèjàayi mpindyewu.

*Ki bwa cinyi nzùbù mujimà wa Izaleela àmanyè ne... (Tèlèjàayi eci)... Nzambi mmuvwijè Yesu umwèumwè ewu, unùdi nwènù... bapoopèle pa nkùrusè ewu, Mukalenge ne Kilisto.*

Kàdi bishi bwa aci? Yèyè m'Mupersona mwisàtù wa busatu anyi, anyi Ùdi busatu bujimà abu? Yèyè ùdi kaabujimà kònswàkònsò kàà Bunzambi, mu mushindu wà mubidi.

202 Cintu pààci ne n'Nzambi yisatu kacitukù to ne: Nzambi Taatù, Nzambi Mwànà, ne Nzambi Nyuma Mwimpè. Aci kaciyènakù mene nansha mu Mifundù to, mwaba nansha wùmwe. Kacyèna mwaba nansha wùmwe to. Kakwènakù mwaba nansha wùmwe wùkaadibo batùtùmìne dîyi bwa kubàtiiza “mu dîna dya Taatù, ne mu dîna dya Mwànà, ne mu dîna dya Nyuma Mwimpè” to, mwaba nansha wùmwe mu Mifundù. Ntwitabàayi wa cyena Katolike, ne kî ngwa ekeleeziya wa Mishònyì nansha. Ndi ndomba muntu kanà yònsò bwa àndeejèku Mufundù wùmwe cyanàànà mùkaadiku muntu nansha umwe mubàtijiibwe mushindu mukwabo kanà wònsò pa kuumusha mu Dîna dya Mukalenge Yesu Kilisto. Lwàku, ùcìndeejè, nenku nènteeke cimanyinu paanyimà pàanyi apa ne: “Mwena lubombo, ne mupròfetà wa mashimi, mulongeshi wa mashimi,” ngenda mu misèèsù mwònsò. Cintu bu nanku kacitukù to. Kacya

muntu nansha umwe kàtukù mubàtìijìbwe mushindu awu to. Ntwitabàayi wa cyena Katolike, kî ndilongesha dya Mishòònyi nansha.

<sup>203</sup> “Maatàayi 28.19,” múdi wamba, “Yesu’s mmwambè ne: ‘Ndàayaaku pa buloba bujimà, nukalongèshè bàà matùngà ònsò, nùbàbàtìizè mu Dìnà dya Taatù, Mwànà, ne Nyuma Mwímpè.’” Aci mmwòmò.

Kàdi kî nne: “Mu dìnà dya Taatù, dìnà dya Mwànà, dìnà dya Nyuma Mwímpè” nansha. *Dìnà* dya Taatù, *Dìnà* (kaciyi mmènà to), dya Taatù. . .

*Taatù* kî ndìnà to. Mbanganyì bàdi bamanyè nanku awu? Mbanganyì bàdiku baataatù kaaba aka? Elàayi byanza muulu. Mbanganyì bàdiku bânà kaaba aka? Elàayi byanza muulu. Mbanganyì bàdi bantu kaaba aka? Elàayi byanza muulu. Eyo. Mpindyewu, dìnà dyebe nganyì? Kî ntaatù, mwànà, anyi muntu to.

<sup>204</sup> Muntu mukàji kàmpànda wàkangambila mungà musangu, yèyè ùwva mutèndeledi wa nzambi yisatu wa maalu muumisha, kwambayè ne: “Mwanètù Branham, kàdi Nyuma Mwímpè’s ndìnà.”

<sup>205</sup> Mèmè ne: “Nyumà Mwímpè kî ndìnà to, Nyumà Mwímpè ncìdiYe. Yèyè *ùdi* Nyumà Mwímpè, kî ndìnà to, aci ncìdiYe. Mèmè ndi muntu, kàdi dìnà dyànyi kî mmuntu to, dìnà dyànyi ng’William Branham.”

<sup>206</sup> Pa nànkù, piikalàbi ne Yèyè wàkamba ne: “Ndàayaaku, nukalongèshè bàà matùnga ònsò, nùbàbàtìizè mu *Dìnà* dya Taatù, ne dya Mwànà, ne dya Nyumà Mwímpè,” pashiishè Peetèlò, paanyimà pàà matùkù dikùmi, kwambayè ne: “Nyingàlàlaayi,” mpindyewu, kaaba aka, tèlejaayi eci:

Nenku pààkumwàbo cyòci eci, bààkalengiibwa bikolè mu *myoyi yabo*, ne bààkambila Peetèlò ne. . . bapostolo bakwabo abu ne: *Balùmyànà ne bânà bèètù, netwènzè cinyi?*

*Ki Peetèlò kubàmbilayè ne: Nyingàlàlaayi, yònsò wa kunùdi, ne nwùbatìijìbwe mu dìnà dya Mukalenge Yesu Kilisto bwa dilekelediibwa dya mpekaatu yenu, nenku nwènù nenùpetè kupà kwà Nyuma Mwímpè.*

<sup>207</sup> Dìbà adi Peetèlò wàkenza cyàkamwambilà Yesu ne kènji anyi? Yèyè kàwva mu cibwejàkàji to, twètù mbàdi mu cibwejàkàji.

<sup>208</sup> Mu Byenzi 2.38, beena Yudà abu bààkabàtìijìbwa mu Dìnà dya Mukalenge Yesu Kilisto, mu kwinyijìbwa kwa mu màyi.

Mu Byenzi, nshapità wa 8, tudi tusangana ne Filipò wàkaya kayiisha beena Sàmaalèyà, ne wàkabàbàtìiiza mu Dìnà dya Mukalenge Yesu Kilisto, beena Sàmaalèyà.

Mu Byenzedi 10.49, Peetèlò wàkatùmina bàà Bisàmbà bya bendè diyì bwa kubàtìijibwabò mu Dìna dya Mukalenge Yesu Kilisto.

<sup>209</sup> Pòlò, Byenzedi 10.5: “Wàkapìcila ku nseke mitùmbùkè ya Efèsò, kusanganayè bayiidi.” Bàvwa mbayiidi ba-Baptistes; bàvwa, muntu ne muntu, ba-Baptistes. Bàvwa bakùdimwisha mucima kùdì muyiishi wa ba-Baptistes dìnà dyèndè—dyèndè, nwamònu’s, Apòlò. Ne yèyè ùvwa muyiishi wa ba-Baptistes: “Ne ùvwa ùjaadikilangana ku Bible ne Yesu ngùvwa Kilisto.”

Pòlò kwambayè ne: “Nukààdi bapetè Nyuma Mwîmpè kacya nwîtabuuja anyì?”

<sup>210</sup> Bòbò kwamba ne: “Katwèna bamanyè ne Nyuma Mwîmpè ùtukù to.”

<sup>211</sup> Yèyè kwamba ne: “Kàdi nwàkabàtìijibwa mushindu kaayi?”

<sup>212</sup> Bòbò ne: “Twètù’s tudi babàtìijibwe kùdì muntu umwèumwè wàkabàtìiza Yesu awu, mu dijiba dya màyi mwàmwa nàka. Aci’s ncìmpèku’s.”

<sup>213</sup> Pòlò kwambayè ne: “Bwa mpindyewu aci kacyakukùmbanakù to. Bìdì bìkèngela bwa nùbatìijibwè, cyàkàbìdì.” Ki Pòlò kubàtùminayè diyì, bwa kubàtìijibwabò cyàkàbìdì, mu Dìna dya Mukalenge Yesu Kilisto. Kubàtentekelayè byanza, ne Nyuma Mwîmpè kubàtùlulukila Yè. Mmwòmò. Eyowa’s, mukalenge.

Nekwikalè Bukènkè pa dîbà dya ìbaamulòòlò,  
Kajila kàà ku Butùmbi nenùkàpetè cya  
bushuwa;

Mu njila wa màyi, ki Bukènkè leelu ewu,  
Bajiikìibwe mu Dìna dya mushinga mukolè  
dya Yesu.

Bànà ne bakolè, nyingàlàlaayi ku mpekaatu  
yenu yònsò,

Nyuma Mwîmpè neàbwelè bushuwa;  
Bukènkè bwa dilòòlò mbufikè,  
Mbulèlèlè ne Nzambi ne Kilisto bàdi Umwe.

<sup>214</sup> Aci ncìdì Bible mwambè. Ncya bushuwa. Ki dîbà ndyòdì edi, ki cikondo ncyòcì eci cìvwà cikèngelà bwa twètù kunyingalala.

<sup>215</sup> Ambàayi, elàayi lubilà panwikalà nukààdi badìlongòlòle, mu ciinà cya màyi. Nenku netwikalè. . . [Mwanèètù wa balùme kampànda ùdì wàmba ne: “Tukààdi badìlongòlòle.”—Muf.] Nukààdi badìlongòlòle? Eyo, bwa kupwekesha maaridò.

<sup>216</sup> Mpindyewu, Mukalenge ànùbènèshèku mpindyewu, pàdi mwanèètù wènza dibàtìiza apa. Nudikù bònsò mwà kumòna kùneeku anyì?





*EBÈLÙ, NSHAPÌTÀ MWIBÌDÌ* ² LUA57-0825E  
(Hebrews, Chapter Two ²)

DILONDANGANA DYA MALONGESHA PA MUKÀNDÀ WÀ EBÈLÙ

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyalumingu dilòlò, mu matùkù 25 a ngondo wa mwandamukùlù, cidimu cya 1957, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêyì ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2021 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)